



Reglur um daggæslu barna í heimahúsum

I. Um leyfisveitingu:

1. Félagsmálaráð Dalvíkur veitir leyfi til gæslu í heimahúsum. Samkvæmt reglugerð um daggæslu í heimahúsum sem sett er með heimild í 35. gr. laga um félagsþjónustu sveitarfélaga nr. 40/1991, ber félagsmálaráð almenna ábyrgð á velferð barna í bæjarfélaginu og skal sjá til þess að aðbúnaði barna sé ekki áfátt. Félagsmálaráð ber ábyrgð á því að höfð sé umsjón og eftirlit með starfsemi dagmæðra. Þeir einir, sem hafa leyfi félagsmálaráðs til að taka börn í gæslu í heimahúsi, hafa heimild til að taka greiðslu fyrir slíka gæslu á Dalvík.
2. Umsókn um leyfi til daggæslu barna í heimhúsi skal skilað til skrifstofu félagsmálastjóra Dalvíkur á þar til gerðum eyðublöðum. Skilyrði fyrir leyfisveitingu er skv. 9. gr. reglugerðar um daggæslu barna í heimahúsum.
 - ⇒ Umsækjandi skal vera orðin 20 ára, og hafa sótt námskeið fyrir dagmæður.
 - ⇒ Læknisvottorð skal staðfesta að umsækjandi og aðrir heimilismenn hafa verið skoðaðir og ekkert fundist athugavert við heilsufar þeirra sem hindrar samvistir við börn.
 - ⇒ Umsækjandi skal leggja fram umsögn síðasta vinnuveitanda eða tveggja ábyrgra aðila. Umsögnin skal bera með sér að umsækjandi teljist hæfur til að taka að sér daggæslu barna.
 - ⇒ Umsækjandi skal leggja fram sakavottorð.
 - ⇒ Brunavarnir þurfa að vera fullnægjandi.
 - ⇒ Ef umsækjandi býr í sambýlishúsi skal leggja fram skriflegt samþykki íbúðareiganda í stigagangi, skv. almennum reglum um sambýlishús.
 - ⇒ Umsækjandi sem býr í leiguhúsnæði skal leggja fram skriflegt samþykki leigusala fyrir dagvistinni.
 - ⇒ Lágmarksleikrými fyrir hvert barn skal vera 3,5 fm. innanhúss, auk þess skal aðstaða til útivistar vera fullnægjandi og hættulaus.



3. Félagsmálaráð hefur heimild til að veita leyfi fyrir allt að 4 börnum undir 6 ára aldri, eru þá meðtalín börn umsækjanda. Leyfisveiting nær til eins árs. Að liðinni eins árs reynslu í starfi skal sótt um endurnýjun leyfisins. Hið endurnýjaða leyfi skal gilda til 3 ára. Við veitingu framhaldsleyfis getur félagsmálaráð veitt leyfi fyrir 5 börn undir 6 ára aldri.
4. Við mat umsóknar skal sérstaklega taka tillit til:
 - ⇒ Menntunar, hæfni og starfsreynslu dagmóður.
 - ⇒ Aðstæðna og húsnæðis, sem nýta á til daggæslunnar.
 - ⇒ Aldurs barnanna.
 - ⇒ Viðverutíma barnanna.
5. Leyfi til dagvistunar á einkaheimilum er afturkallanlegt, ef forsendur leyfisveitingar breyta. Berist ítrekaðar kvartanir um starf leyfishafa og ef hann sinnir ekki ábendingum og viðvörðun félagsmálastjóra, er málinu vísað til ákvörðunar félagsmálaráðs.

II. Umsóknir um vistun barns hjá dagmóður:

1. Sækja skal um dagvist barna á einkaheimilum á skrifstofu félagsmálastjóra á þar til gerðum eyðublaðum.
2. Félagsmálastjóri hefur milligöngu um úthlutun á dagvist barna í heimahúsum.
3. Við upphaf vistunar barns skulu dagmóðir og foreldrar undirrita sérstakan samning á þar til gerðu eyðublaði.



4. Samningi um gæslu í heimahúsi skal segja upp með minnst 1 mánaðar fyrirvara, á þar til gerðu eyðublaði.

III. Um réttindi og skyldur dagmæðra:

1. Dagmóðir ber ábyrgð á andlegri og líkamlegri velferð barnsins meðan á dvöl þess hjá henni stendur og skal hlúa að heilsu þess í sem víðtækustum skilningi. Þetta á jafnt við um fæðuval, tilfinningalíf og félagslega líðan barns. Óheimilt er að beita barn andlegri eða líkamlegri hirtingu.
2. Á hverju gæsluheimili skulu vera leikföng er hæfa aldri og þroska þeirra barna sem þar dvelja.
3. Börn skulu daglega fá heitan hádegisverð.
4. Ef forráðamaður kýs heldur að barnið sitt fái kaldan fullgildan hádegisverð og dagmóðir fellst á það, er það heimilt. Dagmóðir skal dag hvern skrifa matseðil dagsins svo að foreldrar geti fylgst með mataræði barna sinna.
5. Börn skulu njóta útivistar. Dagmæðrum er heimilt að notfæra sér gæsluvöll fyrir börn á aldrinum 2-6 ára, sem eru í þeirra umsjá. Dvöl barna á gæsluvelli skal vera í samráði við forráðamenn barna og starfsfólk gæsluvallar.
6. Sé skólarbarn í daggæslu skal það hafa möguleika á að sinna heimaverkefnum.
7. Gjald vegna vistunar barna í heimahúsi skal miðað við gjaldskrá sem samþykkt er af félagsmálaráði Dalvíkur. Gefa ber kvittun fyrir greiðslu.
8. Æskilegt er að dagmæður hafi frumkvæði að viðræðum við forráðamenn barnanna og skýri daglega frá því hvernig dagurinn hafi gengið fyrir sig hjá viðkomandi barni.



9. Ef barn er vanhirt og/eða á við andlega eða líkamlega örðugleika að stríða, ber dagmóður þegar í stað að ræða um það við forráðamann. Verði dagmóðir þess áskynja að barn sé vanrækt, uppeldi þess, atlæti eða aðbúnaði ábótavant, ber henni jafnframt að tilkynna slíkt til félagsmálaráðs sbr. lög um vernd barna og ungmenna.
Dagmæðrum er ekki skylt að taka barn í gæslu sem er með hita eða greinileg vanlíðunareinkenni vegna sjúkleika.
10. Dagmóðir skal hafa aflað skriflegs samþykkis foreldra, ef hann/hún ekur barni í bíl sínum.
11. Dagmóðir skal kaupa slysatryggingu vegna barnanna.

IV. Um réttindi og skyldur forráðamanna barna í daggæslu:

1. Forráðamenn skulu í samráði við dagmóður gefa barninu möguleika á minnst viku aðlögunartíma á vist á gæsluheimili. Fyrstu dagana skal forráðamaður dvelja með barni sínu.
2. Forráðamenn skulu hafa börnin sín hrein og hlýlega klædd, með viðeigandi skjólfatnað og fatnað til skiptanna ef þess þarf.
3. Forráðamanni ber að tilkynna forföll, eða breyttan komutíma barns eins fljótt og auðið er.
4. Forráðamenn skulu láta dagmóður í té upplýsingar um hvar er hægt að ná til þeirra, ef nauðsyn krefur. Einnig að láta strax vita um breytt símanúmer og heimilisfang.
5. Við komu og brottför barns skal forráðamaður klæða barn sitt í og úr yfirhöfnum.
6. Æskilegt er að forráðamenn spyrjist fyrir um hvernig dagur barnsins hefur gengið fyrir sig, auk þess að ræða við dagmóður þegar barnið er ekki viðstatt.



7. Telji forráðamaður barns eða annar aðili að barn njóti ekki þess aðbúnaðar og atlætis hjá dagmóður sem því ber, skal hann tilkynna það þegar í stað til félagsmálastjóra sem kannar málið.

V. Annað:

Með útgáfu þessara reglna vill félagsmálaráð Dalvíkur stuðla að góðri líðan barnanna á heimilunum og jákvæðum samskiptum forráðamanna þeirra og dagmæðra.

Félagsmálastjóri er starfsmaður félagsmálaráðs og hefur umsjón og eftirlit með daggæslu í heimahúsum, jafnframt ber honum að vera dagmæðrum og foreldrum til ráðlegginga.

Allar persónulegar upplýsingar, sem dagmóðir og forráðamenn kunna að fá hvert um annars hagi vegna þessara samskipta, ber að líta á sem trúnaðarmál.